

Monday, November 24, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

MISHAP

Nizana East Lungdar (Serchhip district) bula truck chesualah mi 2 an thi.

Thu dawn danin Champhai atanga lo chhuk truck, a neitu Pu Lalrinthanga (33) Champhai Zotlang a cheng, khalh chu Biata leh East Lungdar inkar, East Lungdar thlen hma km 1 leh a chanve velah nizan zanlai dar 12 rik hma deuh khan a chesual a, Pu Lalrinthanga hi a hmunah a thi nghal a. Truck a chuang ve second driver Pu Rualthanchama (31) Champhai Zotlang tho chuan hliam na tak a tuar a. East Lungdar primary health centre (PHC)-ah hruai a ni a. A hliam tuar lovin tukin dar 7 leh a chanve khan a thi ve leh. Truck hi kawng thlangah a tlan liama metre 150 zet a lum a ni.

East Lungdar YMA hruaitute leh thalai rual eng emaw zat chuan hliam tuar leh ruang lakchhuah hna hi an thawk a. An chetsualna hmun hi a chhengchhiat em avangin an bungraw senghawi vel pawh a hautak hle dawn niin khawtlang hruaitute chuan an sawi a. An ruang hi post-mortem examination tihfel a nih hnu-ah Champhai Zotlang lama thawn tur a ni ang. Truck khalhtu Pu Lalrinthanga hian a nupui leh a fa pathum a kalsan a, Pu Rualthanchama hian a nupui leh a fa pahnih a kalsan a ni.



COVID

Kumin chhungin Mizoramah Covid-19 hri kai 40 hmuhchhuah a ni a, nunna chan phah erawh an awm lo.

Integrated Disease Surveillance Programme (IDSP) hnathawkte sawi dani kuminah hian Covid-19 hri kai inring an sample endiktir engemawzat an awm a. Chu'ng zingah chuan mi 40 chu hri an kai tih hmuhchhuah a ni a. Kumina hri kai hmuhchhuahte hi hri kai tih lang chhuak an awm meuh lova, na tak pawh an awm lem lo niin an sawi a. Kumin chhunga Covid-19 hri kai hmuhchhuah hnukung ber chu September ni 16 kha a ni a. Hri kai hmuhchhuah hnukung hi September ni 22-a enkawl dam a nih hnu-ah chuan Mizorama Covid-19 hri kai hmuhchhuah emaw, hri kai lai mek emaw an awm tawh rih lo a ni.

Kum 2020 a Covid-19 hri kai leh kai lo endik tan a nih atanga tun thleng hian Mizoramah sample nuai 19, sing 9, sang 8 leh 218 endik a ni tawh a. Chu'ng zinga mi nuai 2, sing 3, sang 9 leh 675 te chuan hri an kai tih hmuhchhuah a ni a, an zinga mi 734 te chuan an thihpui a. Thite hi upa lam leh natna benvawn chi hrang hrang nei sa an ni deuh vek a. Hri kai zinga mi nuai 2, sing 3, sang 8 leh 941 te chu enkawl dam an ni.



TOUR

Assam Rifles thuneitute ruahmanna a Siaha, Lawngtlai leh Lunglei district atanga hnam inpumkhatna atana zinte chuan hmun pawimawh tak tak an tlawh.

District pathum atang hian zirlai 20 leh zirtirtu 2-te chu National Integration Tour-ah hian an kal a. Zirtawpni leh Inrinni khan Amritsar khawpui a sakhaw hmun hlun leh an hnam tana hmun pawimawh tak tak Golden Temple, Jallianwala Bagh, Durgiana Temple leh Govindgarh Fort te an tlawh a. Niliani vek khan sipai hmunpuite tlawhin General Officer Commanding, 15 Infantry Division an kawm bawk a. Punjab State museum an tlawh bakah Pakistan rami Wagah Border-ah sipai thiltih dante an thlir a, an ngaithla bawk.

He ta zin a kalchhuakte hi Thawhtanni khan larsap Gen. Vijay Kumar Singh chuan Raj Bhavan atangin a vailiam a. Guwahati, Delhi leh Amritsar te tlawh tura chhuak an ni. Sairang atangin rel-ah chuangin Guwahati thleng an kal a. Guwahati-ah hian Science Museum, Assam State Zoo-cum-Botanical Garden leh Saraighat Lake Park te an tlawh a. An ruahman dan chuan Amritsar atang hian Delhi lutin National War Memorial leh India Gate te an tlawh bakah Rashtrapati Bhavan tlawhin President an kawm ang a. An tlawh tura ruahman dangte chu Sansad Bhavan, Rajputana Rifles Regimental Centre, Zoological Park, Lotus Temple, Nehru Planetarium, Indian Air Force Museum, Delhi Art Gallery leh Red Fort te a ni a. November ni 29-ah Aizawl an rawn let leh dawn a ni.



VEHICLE REGISTRATION

Transport Department chhinchhiah danin, Aizawl District chhung bika kumin a lirthei registration tih zat chu 19,726 a tling tawh.

Transport Department thawktuten Akashvani News Aizawl an hrilh danin, lirthei ziahluh zingah 2 wheeler a tam ber a, vawiin thlenga Aizawl DTO-a 2 wheeler register zat chuan 15,322 a tling tawh a, lirthei ke hnih nei, man chawi a hman theih pawh kumin chhung hian 185 ziahluh tawh a ni bawk. Aizawl District Transport Office-ah hian kumin chhungin car 2,829 register a ni tawh a, bungraw phur lirthei 916 leh man chawi a mihring phur a service thin lirthei 310 register a ni tawh bawk.



CENTRAL LIBRARY

Art & Culture director Pi Carol VLMS Dawngkimi chuan State Central Library, MINECO a awm chu mipuiten an hlutin, zirlai tlawhtu an thahnem thin hle, a ti.

Akashvani News Aizawl zawhna chhangin, Pi Carol VLMS Dawngkimi chuan Art & Culture Department hnuaiia wing pakhat, State Central Library chu mipui, zirlai leh competitive exam inbuatsaih mekte'n an tlawh nasat thu a sawi a. Career guidance kalpui a nih hnuah pheih chuan, nitin thalai 10 atanga 20 rual an awm reng thin thu a sawi.

Art&Culture Department Director chuan Ministry of Culture atanga lehkhabu leina tur kumtin an dawn atangin Mizoramah pumah NGO Library kalpui a nih thu leh YMA branch hrang hrang, Library neite hnenah kumtin lehkhabu a thlawn a an sem thin thu a sawi a, tun dinhmuna Mizoram chhunga NGO Library awm zat chu 515 a nih thu Akashvani News Aizawl a hrilh bawk.

Pi Carol VLMS Dawngkimi chuan tun dinhmuna State Central Library-ah lehkhabu sing 8 bawr an neih thu sawiin, zirlai - middle school, high school leh college zirlaite chu an lehkhabu chhiar awm tawh State Central Library-ah hian a awm tih hria a, hmang tangkai chhunzawm zel turin a sawm a ni.

